

SARS e ntse e buisana le indasteri ho thibela kgaello efe kapa efe ya mafura

Tshwane, 14 Mphalane 2024- Ditshebeletso tsa Lekgetho tsa Afrika Borwa (SARS) di hlokometse ditlaleho tsa bophatlalatsi ba ditaba tse mabapi le kgaello e ka etsahalang haufinyana tjena ya mafura a jete, eo hape a bitswang kerosene, eo ho thweng e bakwa ke ho tsilatsila ha SARS tabeng ya ho ntshuwa ha dilaesense bakeng sa dikhampani tsa mafura. Ntlhakemo ena e fosahetse. Ho tliswa ka hara naha le ho tsamaiswa ha kerosene ya bofofisi le e tukisang e laolwa ka tsela e matla ke Molao wa Bolaodi ba Meedi le Dihlahiswa tsa Naha. Ho ikamanahya le dipehelo tsa Molao ona ho bonahala ho le thata bakeng sa indasteri ya mafura.

SARS e lakatsa ho hlakisa hore tseko ya kerosene ya bofofisi le e tukisang ka hara Rephablike, e kgotsofatswa ke phephelo e tswang ho bahlahisi ba nang le dilaesense (“mapatlelo a tlhwekiso”) le ka tsela ya thomelo ka hare ho naha.

Haesale ho tloha ka 2022, a mang a mapatlelo a tlhwekiso a sa a kginne bohlahisi ka lebaka la mabaka a mangata a akaretsang tshenyo ya meralo ya ditshebeletso mme a ile a tshepela hodima thomelo ka hare ho naha ho kgotsofatsa tseko. Ka Mmesa 2024, a mang a mapatlelo a tlhwekiso a ile a etsa dikopo tsa hore a fuwe dilaesense tsa nakwana tse ikgethang tsa polokelo (SOS) hore a kgone ho boloka le ho tsamaisa kerosene ya bofofisi ho leba mane ORTIA le maemafofaneng a mang. Sena se ile sa etswa ho qoba qomatsi e ka etsahalang ya kgaello ya kerosene ya bofofisi e neng e ka bakwa ke tlhokomelo e hlokehang ho ya ka molao ya a mang a mapatlelo a tlhwekiso.

Dilaesense tse ileng tsa ntshuwa e ne e le tsa nako e itseng feela, le ho bapa le boemo bo itseng ba ka nako eo. Dilaesense tsena di ntshitswe ka kutlwisiso ya hore ditheo di tla latela metjha ya semmuso ya tlwaelo ya ho fumantshwa dilaesense le ho ba le dibaka tse hlokehang ho latela boikobelo ba molao wa Bolaodi ba Meedi le Dihlahiswa tsa Naha. Polokelo e ikgethang ya bolaodi ba meedi le dihlahiswa tsa naha e nnetefatsa taolo ya dithoto mme e kgontsha SARS ho sireletsa mokotla wa ditjhelete wa mmuso.

SARS e tsitlalletse ho fana ka tlhakisetso le netefaletso ho ditheo tse amehang tse tlohang mokgweng wa pele wa bohlahisi ho ya ho wa thomelohare. Ho bapa le sena, SARS e ntse e thusa le ho tataisa ditheo tsena ho tswela pele ho hweba ho bapa le meedi ya molao ha ka lehlakoreng le leng ho ntse ho ikamahangwa le metjha e hlokehang ya puso.

Hwa bohlokwa, SARS e tla buisana le indasteri ho tsebisa ka tharollo e tlang ho tla ka mehato ya hanghang ya ho tobana le diphephetso tsa jwale ha ka lehlakoreng le leng ho ntse ho nnetefatswa hore ho ikobelwa molao. Ho molemong wa SARS hore ikonomi ya naha le tsa maeto di se sitiswe ke eng kapa eng. Ka mokgwa o tshwanang ho bohlokwa hore bakgathatema bohle le bona ba sebetse ka tsela e potlakileng ho ikobela boitlamo ba bona.

Ho fumana lesedi le fetang lena, ka kopo ikopanye le SARSMedia ho SARSMedia@sars.gov.za